

HEBREOJOB

¹ Ti oñiyi Dios tsi' c'añΛ jini x'alt'añob cha'an mi' pejcan lac ñojte'el. CabΛ tsi' pejcayob ti chajp ti chajp che' bajche' yom ti jujunyajl. ² WΛle, ti ili cojix bΛ q'uin tac tsa'ix i c'añΛ i Yalobil i pejcañonla. Tsi' wa'choco cha'an mi' yΛq'uentel pejtelel chuqui tac an. Tsi' c'añΛ ti' melol pejtel chuqui tac an. ³ Mi' wen ac' ti tsictiyel i ñuclēl i Tat. Mero DiosΛch ajñel. I tsictiyemlelΛch i Tat. Ti' p'ΛtΛlel i t'an mi' cΛntan pejtel chuqui tac an. Che' bΛ tsa' ujt i bajñel poc lac mul, tsa' buchle ti' ñoj jini C'ax Ñuc BΛ am bΛ ti chan. ⁴ Ñumen ñuc bajche' jini ángelob, come ñumen ñuc tsa' otsΛbenti i c'aba' bajche' ángelob.

Ñumen ñuc i Yalobil Dios bajche' ángelob

⁵ Come Dios ma'anic ba' ora tsi' sube ángel mi juntiquilic: “Jatet Calobilet. WΛle tsa' ochiyon ti a Tat”. Ma'anic ba' ora tsi' sube ángel: “A Taton, calobilet”. Mach che'ic tsi' yΛΛ. ⁶ Che' bΛ tsi' choco tilel ti pañimil yΛx alΛ bΛ i Yalobil, Dios tsi' yΛΛ: “La' i ch'ujutesañob Calobil pejtelel ángelob”, che'en. ⁷ Dios tsi' yΛΛ cha'an jini ángelob: “Ora jach mi' majlelob i yángelob che' bajche' ic'. Lajalob jini x'e'telob i cha'an bajche' c'ajc mu' bΛ ti lejmel”, che'en.

⁸ Pero che' bΛ tsi' pejca i Yalobil tsi' yΛΛ: “Buchulet Dios ti a yumΛntel, ti pejtelel ora. Ti a yumΛntel mi caj a mel chuqui toj. ⁹ Tsa' mula chuqui toj. Tsa' ts'a'le jontolil. Jini cha'an joñon, a

Dios, tsa'ix c ñumen aq'ueyet i tijicñayel a pusic'al bajche' yaño' bΛ", che'en.

¹⁰ Tsi' yΛΛ ja'el: "Jatet yumΛlet, ti' cajibal tsa' wa'choco jini pañimil. Jini cha'an i melbalΛch a c'Λb. ¹¹ Mi' caj ti jilel jini pañimil yic'ot panchan, pero mi caj a chΛn ajñel. Mi' caj ti tsuculiyel jini pañimil yic'ot panchan che' bajche' bujcΛ. ¹² Mi' caj a bΛ che' bajche' mi' bΛjlel tsuts. Mi' caj ti q'uextiyel. Pero chΛn junlajalet ti pejtelel ora. Ma'anic mi caj i jilel a jabilel", che'en.

¹³ Dios ma'anic ba' ora tsi' sube ángel: "Buchi' tic ñoj jinto mi cΛq'ueñet a jisan a contrajob". Mach che'ic. ¹⁴ Pejtelel jini ángelob, ¿mach ba espíritujobic mu' bΛ i cha'leñob e'tel? ¿Mach ba chocbilobic tilel cha'an mi' cΛntañob jini mu' bΛ caj i coltΛntelob?

2

Jini ñuc bΛ laj coltΛntel

¹ Jini cha'an wersa yom mi lac wen ac' ti lac pusic'al jini t'an tsa' bΛ la cubi ame laj cΛy mi mach yΛxΛlic la co. ² Isujm i t'an jini ángelob. Majqui jach tsi' ñusΛbeyob i t'an tsi' wersa tojoyob i mul, come ma'anic tsi' jac'Λyob. ³ ¿Bajche' mi mejlel lac puts'el joñonla mi woli lac ñusan jini ñuc bΛ laj coltΛntel? Lac Yum tsi' teche i subol laj coltΛntel. Jini tsa' bΛ i yubibeyob i t'an, tsi' cha' subeyonla ti isujm. ⁴ Dios tsi' teme i t'an yic'otob che' bΛ tsi' pΛsΛ i sujmllel i t'an, yic'ot cabΛ i yejtal tac i p'ΛtΛlel, yic'ot bΛbΛq'uen tac bΛ, yic'ot ñuc tac bΛ i melbal. Tsi' yΛq'ueyob i c'Λjñibal ti chajp ti chajp yic'ot jini Ch'ujul bΛ Espíritu che' bajche' yom i pusic'al.

I Yaj Coltaya winicob

⁵ Come Dios ma'anic tsi' yΛC'Λ ti' wenta ángelob jini tal to bΛ pañimil mu' bΛ lac sub. ⁶ Ts'ijbubil chuqui tsi' yΛΛ David ti salmo: “¿Chucoch ma' wΛC' ti a pusic'al winicob x'ixicob? Yic'ot i Yalobibil Winic, ¿chucoch ma' c'uxbin? ⁷ Tsa' poj ac'Λ ti chumtΛ ti pañimil ba' mach i tajayic i ñucl el ángelob. Tsa' wΛq'ue i ñucl el yic'ot i c'uxbintel ti' tojlel pejtelel chuqui tac an. ⁸ Tsa' wΛq'ue i yumΛntel ti' tojlel pejtel chuqui tac an”, che'en. Che' bΛ tsi' yotsa ti' wenta pejtelel chuqui tac an, ma'anic tsa' cΛle chuqui mach aq'uebilic ti' wenta. WΛle maxto añic woli laj q'uelben i yumΛntel. ⁹ Pero mi laj q'uel Jesús, tsa' bΛ poj peq'uesΛnti ba' mach i tajayic i ñucl el ángelob, tsa'ix cha' aq'uenti i ñucl el yic'ot i c'uxbintel, cha'an tsi' yΛC'Λ i bΛ ti chΛmel, come ti' yutsl el i pusic'al Dios tsa' chΛmi cha'an pejtelelonla.

¹⁰ Dios tsi' mele pejtel chuqui tac an. Woli' cΛntan cha'an mi' tsictesan i ñucl el. Yom mi' yΛq'ueñob i ñucl el pejtel i yalobilob. Jini cha'an tsi' ts'Λctesa i ye'tel ti Jesucristo la caj Coltaya che' bΛ tsi' yΛC'Λ ti wocol cha'an mi' coltañonla cha'an mi lac taj lac ñucl el ti' tojlel.

¹¹ Jini mu' bΛ i saq'uesan winicob x'ixicob yic'ot jini mu' bΛ i saq'uesΛntelob an jach juntiquil i Tat ti pejtelob. Jini cha'an ma'anic mi' cha'len quisin Jesús che' mi' yermanojiñob. ¹² Tsi' yΛΛ: “Mi caj c tsictesΛbeñob a c'aba'. Ti' tojlel jini tempΛbilo' bΛ mi caj j c'Λyin a ñucl el”, che'en. ¹³ Tsi' yΛΛ ja'el: “Mi caj c wen ñop Dios”. Tsi' cha' alΛ: “WΛ' añon quic'ot calobilob tsa' bΛ i yΛq'ueyon Dios”, che'en.

¹⁴ An i bΛc'tal yic'ot i ch'ich'el i yalobilob. Jini cha'an Jesús tsi' taja i bΛc'tal yic'ot i ch'ich'el ja'el

cha'an mi' yac' i b_Λ ti ch_Λmel. Che' b_Λ tsa' ch_Λmi tsi' jisa jini am b_Λ i p'_Λt_Λlel cha'an mi' yac' ti ch_Λmel winicob x'ixicob, jiñ_Λch xiba. ¹⁵ Che' jini tsi' jiti pejtelel jini c_Λch_Λlo' b_Λ ti xiba, mu' b_Λ i cha'leñob b_Λq'uen come mi' cajelob ti ch_Λmel. ¹⁶ Melel ma'anic mi' coltan ángelob. Mi' coltan i p'olbal Abraham. ¹⁷ Jini cha'an wersa tsi' ch'_Λm_Λ i b_Λc'tal Jesús lajal bajche' i b_Λc'tal i yermanojob cha'an mi' yochel ti c'ax ñuc b_Λ motomaj yujil b_Λ p'untaya. Xuc'ul i pusic'al ti' ye'tel Dios cha'an mi' tojbeñob i mul pejtelel winicob x'ixicob. ¹⁸ Tsi' yubi wocol che' b_Λ tsa' p_Λji ti mulil. Jini cha'an mi' mejlel i coltan jini woli b_Λ i p_Λjyelob ti mulil.

3

Ñumen ñuc Jesús bajche' Moisés

¹ Jini cha'an ch'ujul b_Λ hermanojob, jatetla woli b_Λ la' p_Λjyel ti Dios, q'uelela Cristo Jesús, jini chocbil b_Λ tilel. Jiñ_Λch c'ax ñuc b_Λ motomaj lac cha'an mu' b_Λ lac ñop. ² Xuc'ul tsi' melbe i ye'tel Dios tsa' b_Λ i wa'choco, che' bajche' xuc'ul tsi' mele i ye'tel Moisés ti' tojlel i cha'año' b_Λ Dios. ³ Jini xmel otot ñumen an i ñucler bajche' i yotot. Che' ja'el ñumen yom mi' laj c'uxbin Jesús bajche' Moisés come ñumen ñuc. ⁴ Ti jujump'ejl otot añ_Λch majqui tsi' mele. Pero jini tsa' b_Λ i mele pejtelel chuqui tac an, jiñ_Λch Dios. ⁵ Moisés xuc'ul tsi' melbe i ye'tel Dios ti' tojlel i cha'año' b_Λ Dios. I winic_Λch. Tsi' w_Λn tsictesa jini tsa' b_Λ tili ti wi'il. ⁶ Pero Cristo i Yalobil_Λch Dios. Mi' c_Λntan ti xuc'ul i cha'año' b_Λ Dios. Tsiquil che' jini, i cha'año_nla Dios mi' c'_Λl_Λ ti'

jilibal ch_Λn lotol ti lac pusic'al chuqui tsa' lac ñopo, mi xuc'ul mi lac pijtan ti' tijicñ_Λyel lac pusic'al.

P_Λybilob cha'an mi' c'ajob i yo

⁷ Jini cha'an, che' bajche' mi' y_Λl jini Ch'ujul b_Λ Espíritu: “Mi woli la' wubiben i t'an Dios, ⁸ mach mi la' w_Λc' ti ts_Λts'an la' pusic'al che' bajche' tsi' cha'leyob la' tatob che' b_Λ tsi' contrajiyob ya' ti colem b_Λ i tiquiñal lum che' b_Λ tsi' yil_Λbeyob c pusic'al. ⁹ Tsi' yil_Λbeyob c pusic'al. Tsi' ñusayob c t'an. Cha'c'al jab tsi' q'ueleyob c melbal. ¹⁰ Che' jini tsi' techbeyob c mich'ajel jini año' b_Λ ti yamb_Λ ora. Tsac subu: Ti pejtelel ora an i sajtemal come leco chuqui tsi' ña'tayob ti' pusic'al. Ma'anic tsi' ñopoyob c bijlel. ¹¹ Jini cha'an mich' tsac subu ti isujm: Ma'anic mi caj c_Λq'ueñob i c'aj i yo”. Che' mi' y_Λl jini Ch'ujul b_Λ Espíritu. ¹² Jini cha'an hermanojob, ch_Λc_Λ q'uele la' b_Λ ame tejchic jontolil ti la' pusic'al, ame mi la' c_Λy jini cuxul b_Λ Dios mi mach xuc'ulic mi la' ñop. ¹³ Pero yom mi la' xic'ben la' b_Λ ti uts'at ti jujump'ejl q'uin che' woli to i p_Λyonla, ame ts_Λts'ac la' pusic'al ti mulil yujil b_Λ lotiya. ¹⁴ Lac tem cha'añ_Λch i yutsllel i pusic'al Dios la quic'ot Cristo mi c'Λ_Λl ti'jilibal mi lac ch_Λn ñop che' bajche' ti ñaxan ti' xuc'tilel lac pusic'al. ¹⁵ I t'an Dios mi' subeñonla: “Mi woli la' wubiben i t'an Dios, mach mi la' w_Λc' ti ts_Λts'an la' pusic'al che' bajche' tsi' cha'leyob che' b_Λ tsi' contrajiyob”. Che' mi' y_Λl.

¹⁶ ¿Majqui tsi' contrajiyob che' b_Λ tsi' yubibeyob i t'an? ¿Mach ba pejtelobc tsa' b_Λ loq'uiyob ti Egipto yic'ot Moisés? ¹⁷ Cha'c'al jab tsi' techbeyob i mich'ajel. Dios tsi' mich'le jini tsa' b_Λ i cha'

leyob mulil. Tsa' yajliyob i bΛc'tal ya' ti jochol bΛ lum. ¹⁸ Dios tsi' tajayob ti t'an che' bΛ tsi' yΛΛ ti isujm: “Ma'anic mi caj cΛq'ueñob i c'aj i yo”, che'en. JiñobΛch tsa' bΛ i ñusΛbeyob i t'an. ¹⁹ Tsiquil che' jini, ma'anic tsa' mejliyob ti ochel, come ma'anic tsi' ñopoyob.

4

¹ Woli to i pΛyonla Dios cha'an mi' yΛq'ueñonla laj c'aj la co. Jini cha'an yom tsajilonla ame anic ti la' tojlel majqui ma'anic mi' c'aj i yo ti lac Yum. ² Come tsa'ix subentiyonla jini Wen T'an lajal bajche' tsa' subentiyob. Pero ma'anic chuqui tsi' tajayob che' bΛ tsi' yubiyob come ma'anic tsi' ñopoyob. ³ Pero joñonla mu' bΛ lac ñop Dios, ochemonla ba' mi laj c'aj la co, che' bajche' tsi' yΛΛ: “Mich'on tsac subu ti isujm: Ma'anic mi caj cΛq'ueñob i c'aj i yo quic'ot”. Che' tsi' yΛΛ Dios, anquese ujtemix i melbal c'ΛΛΛ ti' tejchibal pañimil. ⁴ Come an ba' ts'ijbubil jini t'an cha'an i wucp'ejlel q'uin: “Ti' wucp'ejlel q'uin Dios tsi' c'aja i yo che' ujtemix pejteli ye'tel”. Che'Λch ts'ijbubil. ⁵ Ts'ijbubil ja'el: “Ma'anic mi caj i yochelob ti c'aj o”, che'en.

⁶ Tsiquil mi caj i c'ajob i yo yaño' bΛ, come ma'anic tsi' c'ajayob i yo jini tsa' bΛ subentiyob jini Wen T'an ti ñaxan, come xñusa t'año. ⁷ Tsi' cha' taja ti t'an i yorajlel c'aj o che' bΛ tsa' ñumi cabΛ jab. Tsi' subu ti' jun David jini jach bΛ t'an: “Mi woli la' wubiben i t'an wΛle, mach mi la' wΛc' ti tsΛts'an la' pusic'al”. Che' tsi' yΛΛ. ⁸ Tsa'ic i yΛq'ueyob i c'aj i yo jini Josué, ma'anic tsi' cha' alΛ Dios ti wi'il. ⁹ Tsiquil che' jini, an yambΛ c'aj o woli bΛ i

pijtañob i cha'año' b_Λ Dios. ¹⁰ Come majqui jach mi' c'aj i yo ti Dios, mi' c_Λy i mel i ye'tel che' bajche' Dios tsi' c'aja i yo che' ujtemix i ye'tel. ¹¹ La' lac cha'len wersa cha'an mi' laj c'aj la co, ame anic majch mi' yajlel ti mulil che' bajche' la' tatob tsa' b_Λ i ñus_Δbeyob i t'an.

¹² Come cuxul i t'an Dios. Wen p'_Λt_Λ. Ñumen jay bajche' espada am b_Λ i yej ti' cha'wejllel. Mi' s_Λl jec' lac pusic'al yic'ot lac ch'ujlel. Mi' tsictesan chuqui woli' y_Λ lac pusic'al yic'ot chuqui yom lac pusic'al. ¹³ Ma'anic mucul tac b_Λ ti' wut Dios. Jam_Λ ti' wut pejtrel chuqui tac an. Wersa mi' caj lac mel lac b_Λ ti' tojlel jini mu' b_Λ i lu' q'uel.

Jesús jini c'ax ñuc b_Λ la caj motomaj

¹⁴ An c'ax ñuc b_Λ la caj motomaj tsa' b_Λ ochi ti panchan ti' tojlel Dios. Jiñ_Λch Jesús, i Yalobil Dios. Jini cha'an la' lac ch_Λn ac' ti lac pusic'al jini tsa' b_Λ lac ñopo mu' b_Λ lac sub. ¹⁵ C'ax ñuc la caj motomaj. Yujil i p'untañonla, come yujil c'uñonla. Tsa' p_Λjyi ti chajp ti chajp b_Λ mulil ja'el, che' bajche' mi' lac p_Λjyel ti mulil. Pero ma'anic tsi' jac'Λ. ¹⁶ Jini cha'an yom ch'ejl lac pusic'al mi' lac l_Λc'tesan lac b_Λ ba'an i buchlib Dios ba' mi' p_Λsbeñonla i yutslel i pusic'al. Ya'i mi' caj lac p'unt_Δantel. Mi' caj laj colt_Δantel ti' yutslel i pusic'al che' an wocol ti lac tojlel.

5

¹ Pejtrel ñuc b_Λ motomaj yajc_Δbil b_Λ ti' tojlel winicob, an ti' wenta cha'an mi' melben i ye'tel Dios cha'an i wenlel winicob. Mi' y_Λq'uen Dios ofrenda yic'ot ts_Δns_Δbil b_Λ i majtan cha'an mulil. ² Mi' mejlel i p'untan jini mach b_Λ anic i ña't_Δbal yic'ot

jini woli b_Λ ti sajtel, come winic ja'el. ³ Jini cha'an wersa yom mi' y_Λq'uen i majtan Dios cha'an i bajñel mul, che' bajche' mi' y_Λq'uen i majtan cha'an i mul yaño' b_Λ. ⁴ Ma'anic majch mi' bajñel ch'Λm jini ñuc b_Λ e'tel, cojach jini mu' b_Λ i p_Λjyel ti Dios che' bajche' tsa' p_Λjyi Aarón.

⁵ Cristo ja'el ma'anic tsi' bajñel ñuq'uesa i b_Λ cha'an mi' bajñel otsan i b_Λ ti c'ax ñuc b_Λ motomaj. Tsa' subenti: “Jatet Calobilet. W_Λle tsa' ochiyon ti a Tat”, che'en. Jini tsa' b_Λ i sube ili t'an tsi' wa'choco. ⁶ Tsi' y_ΛΛ ti yamb_Λ salmo ja'el: “Jatet motomajet ti pejtelel ora. Wa'chocobilet ti' motomajil Melquisedec”, che'en.

⁷ Che' w_Λ'to chumul Jesús ti pañimil, tsi' pejca Dios am b_Λ i p'Λt_Λlel cha'an mi' y_Λc' ti colel ame ch_Λmic. Tsi' c'ajtibe ti wocol t'an. C'am tsi' cha'le uq'uel. Tsa' tili i ya'lel i wut. Dios tsi' yubibe i t'an i Yalobil come uts'at tsi' jac'Λ ti pejtelel ora. ⁸ Pero anquese i Yalobil_Λch, ti' caj i wocol tsi' wen ñopo ch'ujbiya. ⁹ Che' b_Λ tsa' ts'Λctiyi i chajp_Λntel yic'ot i ñucllel Jesús, tsa' ochi ti la caj Coltaya ti pejtelel ora. Mi' coltan pejtelel mu' b_Λ i jac'beñob i t'an. ¹⁰ Dios tsi' subu ti c'ax ñuc b_Λ motomaj wa'chocobil b_Λ ti' motomajil Melquisedec.

Jini mu' b_Λ i c_Λyob Dios

¹¹ Anto chuqui com c subeñet lojon, come cab_Λl i sujmllel ili motomajil. Wocol mi la' ch'Λmben isujm come m_Λc_Λl la' chiquin yubil. ¹² Anix ora tsa' la' wubi jini t'an. Anquese i yorajlelix mi la' wochel ti x_Λntesajob, anto yom majqui mi' cha' c_Λntesañetla c'Λl_Λl ti' cajibal i sujmllel i t'an Dios. La' wom to la' chu' yilal. Maxto mejlic la' c'ux waj.

13 Come majqui jach woli to ti chu', maxto wen yujilic bajche' yom mi' yajñel ti toj, come alal to.
 14 Pero mi laj c'ux waj che' tsa'ix lac taja laj colel, che' cañalix lac cha'an chuqui wen yic'ot chuqui mach wenic.

6

1 Jini cha'an mach yomix mi lac chan jal'an ti' ñopol i cajibal i sujmllel Cristo. La' wen sojlic ti lac pusic'al pejtelel i sujmllel, mach jinic jach i tejchibal cantesa. Yom mi lac junyajlel cay jini lolom jach ba lac melbal cha'an mi lac ñop Dios.

2 Jasalach la' cantesantel ti ch'amja' yic'ot ti yac'ol c'abal ti la' jol. Tsa'ix la' wubi mi' tejchelob ch'ojoyel chameño' ba. Tsa'ix la' wubi i sujmllel toj mulil mach ba yujilic jilel. Jasal la' cantesantel ti ili tac.

3 Pero anto yom mi la' taj la' colel ti Cristo. La' lac ñop ti pejtelel che' bajche' yom Dios. 4 Jini mu' ba i junyajlel cayob Dios, ¿bajche' mi caj i cha' ñopob? Tsa'ix i can q'ueleyob i saclel. Tsa'ix i can tajayob i wenlel ti Dios yic'ot ti Ch'ujul ba Espiritu. 5 Tsi' ña'tayob uts'at i t'an Dios. Tsi' yubiyob i p'atlel i yumantel mu' ba caj i tilel. 6 Pero tsi' tats'ayob i ba. Mach mejlix lac chan ñijcabeño' i pusic'al cha'an mi' cha' sutq'uiño' i ba, come woli' cha' ch'ijob ti cruz i Yalobil Dios yilal. Woli' yac'ob ti wajlentel.

7 Dios mi' yac'uen i bendición jini lum mu' ba i chan jap ja'al che' mi' choc tilel. Mi' yac' ti colel uts'at tac ba lac pac'bal. 8 Pero mi woli jach i yac' ti colel pimel am ba i ch'ixal, ma'anic i c'ajñibal jini lum. Pujch'emix. I yum mi caj i cay. Mi' caj ti pulel.

9 C'uxbibilo' ba, anquese che'ach wolic subeñet lojon, cujil lojon uts'at añetla. Woli la' wac' la'

wut ti uts'at come coltΛbiletla. ¹⁰ Come mach jontolic Dios. Mach ñajΛyic i cha'an la' melbal yic'ot la' c'uxbiya, come ti' c'aba' Dios tsa' la' colta i cha'año' bΛ. Woli to la' coltañob. ¹¹ Pero com lojon chΛn bΛxetla ti jujuntiquiletla c'ΛΛΛ mi la' chΛmel, cha'an mi la' taj pejtēl woli bΛ la' pijtan. ¹² Mach comic lojon mi la' lij la' bΛ. Tsajcanla majlel jini woli bΛ i yΛq'uentelob pejtelel jini albil bΛ i cha'an Dios, come mi' chΛn cha'leñob pijt ti' xuc'talel i pusic'al woli bΛ i ñopob.

¹³ Dios che' bΛ tsi' yΛq'ue Abraham i t'an, tsi' bajñel xuc'choco i t'an. Come ma'anic yambΛ ñuc bΛ bajche' Dios tsa' bΛ mejli i xuc'chocon. ¹⁴ Tsi' sube Abraham: “Ti isujm cabΛΛ mi caj cΛq'ueñet bendición. Mi caj c wen p'ojlesΛbeñet a p'olbal”. Che' tsi' yΛΛ Dios. ¹⁵ Che' jal tsi' pijta Abraham ti' xuc'talel i pusic'al, tsi' taja chuqui albil i cha'an Dios.

¹⁶ Ti isujm, winicob mi' tajbeñob i c'aba' jini ñumen ñuc bΛ cha'an mi' xuc'chocoñob i t'an. Che' mi' xuc'chocoñob ti' c'aba' yambΛ, ma'anix majch mi mejlel i jem. ¹⁷ Dios ja'el yom i wen tsictesΛbeñonla mach mejlic ti jejmēl i t'an. Pejtēl mu' bΛ i ñopob mi caj i yΛq'uentelob chuqui albil i cha'an. Jini cha'an tsi' bajñel taja i c'aba' cha'an mi' xuc'chocon i t'an. ¹⁸ Dios mach mejlic i cha'len lot. An cha'chajp mach bΛ yujilic q'uextΛyel. JiñΛch i xuc'talel i pusic'al yic'ot albil bΛ i t'an. Jini cha'an joñonla tsa' bΛ lac taja laj coltΛntel ti Dios, mi lac taj i ñuq'uesΛntel lac pusic'al cha'an mi lac chΛn pijtan chuqui subebilonla. ¹⁹⁻²⁰ Jini lac pijtaya, jiñΛch mu' bΛ i tsats xuc'chocoñonla. Mi' yΛc'onla ti ochel ti junwejl pisil bΛ tsalΛl yilal ya' ti panchan ba' tsa'

ñaxan ochi Jesús cha'añonla. Tsa' ochi ti c'ax ñuc b_Λ motomaj ti pejtelel ora wa'chocobil ti' motomajil Melquisedec.

7

I motomajil Melquisedec

¹ Che' b_Λ tsi' m_{ΛΛ} Abraham ti' tojlel jini reyob, tsa' tili Melquisedec cha'an mi' taj che' wolix ti sujtel. Melquisedec jiñ_Λch i rey Salem, i motomaj jini Nuc b_Λ Dios. Melquisedec tsi' y_Λq'ue Abraham i yutslel i t'an. ² Abraham tsi' y_Λq'ue i diezmojlel pejteli i chub_Λ'an. An i sujmllel i c'aba' Melquisedec ti lac t'an, jiñ_Λch Toj b_Λ Rey am b_Λ ti Salem. Jiñ_Λch Rey yujil b_Λ N_Λch'chocoya. ³ Ma'anic i tat i ña'. Ma'anic tsa' tajle i c'aba' i ñojte'el. Ma'anic i cajibal, ma'anic i jilibal. Lajal_Λch bajche' i Yalobil Dios. Motomaj ti pejtelel ora.

⁴ Ña'tanla i ñucllel jini Melquisedec. Abraham lac p_Λq'uil tsi' y_Λq'ue i diezmojlel pejtelel chuqui tsi' taja ti guerra. ⁵ Isujm, ts'ijbubil ti jini mandar an ti' wenta i p'olbal Leví mu' b_Λ i yochelob ti motomajil cha'an mi' ch'_Λmbeñob i diezmojlel i chub_Λ'an i pi'_Λlob. Anquese laj i p'olbalob Abraham ti pejtelelob, pero che'_Λch yom mi' y_Λq'ueñob i chub_Λ'an i pi'_Λlob. ⁶ Pero jini Melquisedec mach b_Λ i p'olbalic Leví, tsi' ch'_Λmbe i diezmojlel i chub_Λ'an Abraham. Tsi' y_Λq'ue i yutslel i t'an jini am b_Λ i cha'an jini albil b_Λ t'an. ⁷ Isujm, jini ñuc b_Λ mi' y_Λq'uen i yutslel i t'an jini mach b_Λ yoque ñuquic. ⁸ Isujm, mi' ch'_Λmob diezmo i p'olbalob Leví yujilo' b_Λ ch_Λmel. Pero mi' subeñonla i Ts'ijbujel Dios ch_Λn cuxul Melquisedec. ⁹ Mi mejlel la c_Λl: Jini

Leví (i ñojte'el jini mu' b Δ i ch' Δ mob diezmo) anto ti Abraham ba' ora tsi' y Δ q'ue Melquisedec i diezmojlel i chub Δ 'an. ¹⁰ Come jini Leví i p'olbal Δ ch Abraham. Ya'to an Leví ti' b Δ c'tal Abraham che' b Δ tsi' taja Melquisedec.

¹¹ Dios tsi' y Δ q'ueyob israelob jini ts'ijbubil b Δ mandar ti' wenta i p'olbal Leví. Tsi' wa'choco motomajob tilemo' b Δ ti Aarón, i yalobil b Δ Leví. Tsa'ic mejli i coltañonla i p'olbal Leví, ma'anic tsi' wersa choco tilel yamb Δ motomaj wa'chocobil b Δ ti' motomajil Melquisedec. Come parte jini Melquisedec, mach tilemic ti Aarón. ¹² Che' b Δ tsa' loq'ui ti' motomajil i p'olbal Aarón, wersa tsa' q'uext Δ yi jini mandar. ¹³ Come mach tilemic ti Leví Cristo tsa' b Δ ochi ti motomaj, pero tilem ti Judá, jini yamb Δ junmojt israelob ba' ma'anic mi juntiquilic tsa' b Δ i cha'le i ye'tel ti motomaj ti' t'ejl i pul Δ ntib i majtan Dios. ¹⁴ Come ña't Δ abil lac cha'an tsa' tili lac Yum ti' p'olbal Judá, pero Moisés ma'anic tsi' y Δ Δ mi tal motomaj ti' p'olbal Judá.

¹⁵ Tsiquil che' jini tsa'ix tejchi yamb Δ motomaj che' bajche' Melquisedec. ¹⁶ Che' b Δ tsa' ochi ti motomaj, mach wa'chocobilic i cha'an winicob che' bajche' ts'ijbubil ti mandar. Pero wa'chocobil ti motomaj yic'ot i p' Δ t Δ lel i cuxt Δ lel mach b Δ yujilic jilel. ¹⁷ Jump'ejl salmo tsi' taja ti t'an Cristo che' b Δ tsi' y Δ Δ : “Motomajet ti pejtelel ora. Wa'chocobilet ti' motomajil Melquisedec”, che'en. ¹⁸ Isujm tsa' q'uextiyi jini ñaxan b Δ mandar come ma'anic i p' Δ t Δ lel. Ma'anic i c' Δ jñibal. ¹⁹ Come jini mandar ma'anic tsa' mejli i y Δ q'ueñonla lac p' Δ t Δ lel cha'an ts' Δ c Δ l mi lac jac'. Pero tsa' tili wen uts'at b Δ lac

pijtaya yic'ot Cristo. Jini cha'an mi mejlel lac lac'tesan lac b_Λ ba'an Dios.

²⁰ Dios tsi' y_Λc'Λ i t'an che' b_Λ tsa' ochi Cristo ti motomaj. ²¹ Mach che'ic tsi' mele ti' tojlel yamb_Λ motomajob che' b_Λ tsa' cajiyo b' ti' ye'tel. Pero Dios tsi' y_Λc'Λ i t'an ti' tojlel Jesús. Tsi' sube: “A Yum Dios tsa'ix i y_Λc'Λ i t'an. Ma'anic mi' q'uextan i pusic'al. Jatet motomajet ti pejtelel ora”, che'en. ²² Jini cha'an la cujil ñumen wen jini tsiji' b_Λ trato, come mi' xuc'chocontel ti Jesús.

²³ Ti yamb_Λ ora wersa tsa' wa'chocontiyob cabal motomajob. Mach jalic tsa' ajniyo b' ti' ye'tel, come tsa' ch_Λmiyo b' ti' jujuntiquil. ²⁴ Pero Cristo mi' yajñel ti pejtelel ora. Ma'anic mi' q'uext_Λyel i motomajil. ²⁵ Jini cha'an mi mejlel i junyajlel coltan pejtel mu' b_Λ i lac'tesañob i b_Λ ba'an Dios ti' tojlel Jesús. Come ch_Λn cuxul ti pejtelel ora. Woli' ch_Λn tajob ti oración ti' tojlel Dios.

²⁶ Jesús jiñ_Λch c'ax ñuc b_Λ la caj motomaj che' bajche' yom lac cha'an. Come ch'ujul_Λch, ma'anic i jontolil, s_Λc i pusic'al, mach xmulilic. Tsa'ix aq'uenti i ñucl_Λel ti panchan. ²⁷ Mach wersajic mi' ts_Λns_Λben i majtan Dios ti jujump'ejl q'uin che' bajche' yamb_Λ motomajob. Ñaxan tsi' ts_Λns_Λbeyob i majtan Dios cha'an i bajñel mul, ti wi'il cha'an i mul i pi'lob. Pero Jesús tsi' tojo lac mul che' b_Λ tsi' y_Λc'Λ i b_Λ ti ch_Λmel che' bajche' ts_Λns_Λbil b_Λ i majtan Dios. Jas_Λl junyajl tsa' ch_Λmi. ²⁸ Jini mandar mi' wa'chocon ti ñuc b_Λ motomaj winicob am b_Λ i c'unlel i pusic'al. Pero Dios tsi' wa'choco i Yalobil tsa' b_Λ ts'_Λactiyi i p'_Λt_Λlel yic'ot i ñucl_Λel ti pejtelel ora.

8

Jesús tsi' yΛq'ueyonla ñumen wen bΛ trato

¹ An ñuc bΛ i sujmllel jini woli bΛ c sub lojon. Jiñach iliyi: An c'ax ñuc bΛ la caj motomaj tsa' bΛ buchle ti' ñoj jini C'ax Ñuc bΛ woli bΛ ti yumantel ya' ti panchan. ² Woli' mel i ye'tel motomaj ya' ti jini C'ax Ch'ujul bΛ Ajñibal, jini mero isujm bΛ otot tsa' bΛ i wa'choco lac Yum. Mach jinic pisil bΛ otot tsa' bΛ i wa'chocoyob winicob.

³ Come ti pejtelel ñuc bΛ motomajob añob i ye'tel cha'an mi' yΛq'ueñob Dios ofrenda yic'ot tsansabil bΛ i majtan. Jini cha'an wersa an chuqui mi' yΛc' ja'el jini ñuc bΛ motomaj lac cha'an. ⁴ WΛ'ic an ti pañimil Jesús, mach motomajic, come an motomajob mu' bΛ i yΛq'ueñob i majtan che' bajche' ts'ijbubil ti mandar. ⁵ Pero jini motomajob woli' pasob i yejtal jach chuqui an ti panchan, i yΛxñallel jach yilal. Come che' bΛ tsa' subenti Moisés bajche' yom mi' mel jini tabernáculo, Dios tsi' sube: “Yom ma' wen q'uel cha'an lajal ma' mel ti pejtelel che' bajche' tsac pasbeyet ya' ti wits”, che'en.

⁶ Pero Jesús tsa'ix i taja ñumen ñuc bΛ i ye'tel come tsi' yΛq'ueyonla ñumen wen bΛ trato ti' tojlel Dios cha'an mi lac pijtan chuqui tac uts'at, albil bΛ i cha'an Dios. ⁷ Come tsa'ic mejli i coltañonla jini ñaxan bΛ trato ma'anic tsa' ajq'ui yambΛ ti' q'uexol. ⁸ Tsi' ña'ta Dios quepel jini t'an che' bΛ tsi' yΛΛ: “Awilan, tal i yorajlel, mi caj c wa'chocon tsijib xuc'ul bΛ t'an yic'ot i p'olbal Israel yic'ot i p'olbal Judá. ⁹ Mach lajalic bajche' jini xuc'ul bΛ t'an tsa' bΛ c mele yic'ot i ñojte'elob, che' bΛ tsac chuchbeyob i c'Λb cha'an mic pΛyob loq'uel ti' lumal Egipto.

Ma'anic tsi' wen jac'ayob. Jini cha'an tsac tats'Λ c bΛ.

¹⁰ Mi caj c mel yambΛ xuc'ul bΛ t'an yic'ot jini israelob che' ñumenix cabΛΛ q'uin. Jiñach iliyi: Mi caj cΛq'ueñob i ña'tan c mandar ti' pusic'al. Mi caj i c'uxbiñoñob come i Dioson. Mi caj c cha'aniñob.

¹¹ Mach wersajix mi caj i cΛntesan i pi'Λlob, mi i yerañob. Ma'anic mi caj i yΛlob: Ñopo lac Yum, come ti pejtelelob mi caj i ñopoñob, jini alΛlob yic'ot jini ñoxobix bΛ, ¹² come mi caj c ñusΛbeñob i mul. Ma'anic mi caj c chΛn ña'tΛbeñob i jontolil". Che' tsi' yΛΛ Dios. ¹³ Che' bΛ tsi' yΛΛ tsijib jini pacto tsi' tsicitesa ma'anix i c'Λjñibal jini oñiyix bΛ. Chuqui tac mach tsijibic woli bΛ ti tsuculiyel mach jalix mi' sac jilel.

9

¹ Dios tsi' yΛq'ueyonla mandar yic'ot jini ñaxan bΛ trato. Tsi' cΛntesayonla bajche' yom mi lac ch'ujutesan yic'ot bajche' yom mi' yujtel i ye'tel ti ch'ujul bΛ ajñibal ila ti pañimil. ² Tsa' mejli pisil bΛ otot. Ya' ti ñaxan bΛ i mal i c'aba' Ch'ujul bΛ Ajñibal an lámpara yic'ot mesa, yic'ot waj tsa' bΛ ajq'ui ti mesa. ³ An yambΛ i mal ti' pat jini cha'wejlel bΛ pisil i c'aba' C'ax Ch'ujul bΛ Ajñibal. ⁴ Ya'an i pulΛntib pom melbil bΛ ti oro yic'ot caxate' laj tep'bil bΛ ti oro ba' lotol jini xuc'ul bΛ t'an. Ya' ti mal caxate' an p'ejt melbil bΛ ti oro ba' lotol maná. Ya'an ja'el i barate' Aarón tsa' bΛ i cha'le nich yic'ot jini xajlel ba' ts'ijbubil jini lujump'ejl mandar. ⁵ Ya' ti' pam jini caxate' an i yejtal querubiñob mu' bΛ i ñuq'uesañob Dios. I yΛxñΛlel i wich' tsa' c'oti ti' pam i majc caxate' ba' tsa' ñusΛbentiyob i mul winicob.

Wale mach yomic mic laj tsictesabeñetla i sujmllel i bal jini otot.

⁶ Chajpabilix jini otot, mi' yochelob jini motomajob ti ñaxan ba i mal cha'an mi' melob i ye'tel ti jujump'ejl q'uin. ⁷ Pero ti cha'tsajlel i mal, cojach mi' yochel jini ñuc ba motomaj junyajl jach ti jump'ejl jab. Wersa mi' ch'am ochel ch'ich' mu' ba i yac' cha'an i bajñel mul yic'ot i mul winicob x'ixicob che' mach tsajilobic i cha'an. ⁸ Che' bajche' jini, jini Ch'ujul ba Espiritu mi' yaq'ueñonla lac ña'tan maxto tsictiyemic bajche' mi la cochel ti jini C'ax Ch'ujul ba Ajñibal che' wa'al to jini ñaxan ba otot. ⁹ Jini pisil ba otot, jiñach i yejtal jini isujm ba otot mu' ba i yaq'ueñonla Cristo wale. Ti jini pisil ba otot tsa' aq'uenti Dios ofrenda tac yic'ot tsansabil ba i majtan mach ba mejlic i junyajlel ñach'chocobeñob i pusic'al jini mu' ba i cha'leñob ch'ujutesaya. ¹⁰ Come i melbal jach winicob ili waj yic'ot ili japbil ba. Mi' pocob ti ja'. I yejtal jach jini mero isujm ba. Che' mi' tilel jini isujm ba, mi' jilel i c'ajñibal yamb.

¹¹ Wale tsa'ix tili Cristo, jini c'ax ñuc ba motomaj mu' ba i yaq'ueñonla jini uts'at ba. Come an ñumen ñuc ba otot wen melbil ba, jiñach mero i chumlib Dios. Mach melbilic ti c'abal che' bajche' jini melbil ba ti pañimil. ¹² Tsa' junyajlel ochi Cristo ya' ti Ch'ujul ba Ajñibal. Mach i ch'ich'elic ala chivo mi ala tat wacax, pero yic'ot i bajñel ch'ich'el tsa' ochi ti jini Ch'ujul ba Ajñibal ti chan, come tsi' mañayonla cha'an mi la cajñel yic'ot ti pejtelel ora. ¹³ I ch'ich'el tat wacax yic'ot i ch'ich'el ala chivo yic'ot i tañil ala ña' wacax tsa' mejli i poj saq'uesabeñob i bac'tal jini bibi'o ba che' tsijcabil ti'

pam. ¹⁴Ñumen i c'ajñibal i ch'ich'el Cristo. Come mi' poc loq'uel ti lac pusic'al jini tsucul b_Λ lac melbal cha'an mi lac melben i ye'tel jini cuxul b_Λ Dios. Ti' p'at_Λlel jini Espíritu mach b_Λ ajnic mi' jilel, Cristo tsi' y_Λc'Λ i b_Λ che' bajche' ch'ujul b_Λ i majtan Dios mach b_Λ anic i mul.

¹⁵Jini cha'an Cristo tsi' mele jini tsijib xuc'ul b_Λ t'an cha'an mi' y_Λq'uentelob jini p_Λybilo' b_Λ ti Dios jini bendición tsa' b_Λ i w_Λn ña'ta. An i p'at_Λlel Cristo cha'an mi' mel iliyi, come tsa' ch_Λmi cha'an mi' ñu_Λsabeñob i mul jini añob to b_Λ ti wenta ñaxan b_Λ trato. ¹⁶Che' an majqui mi' ch_Λmel, mi tsi' w_Λn mele ts'ijbubil b_Λ jun ba' mi' y_Λl woli' t'ox i chub_Λ'an, ma'anic majch mi mejlel i ch'Λm jinto ch_Λmenix i yum. ¹⁷Che' ch_Λmenix mi' yujtel che' bajche' ts'ijbubil. Ma'anic mi' yujtel che' cuxul to i yum tsa' b_Λ i ts'ijba.

¹⁸Jini ñaxan b_Λ trato ja'el ma'anic i p'at_Λlel jinto tsa' bejq'ui ch'ich'. ¹⁹Moisés che' b_Λ tsa' ujt i subeñob pejtelel winicob pejtelel i mandar Dios tsi' ch'Λm_Λ i ch'ich'el al_Λ wacax yic'ot i ch'ich'el chivo yic'ot ja', yic'ot ch_Λch_Λc b_Λ i tsutsel tiñame', yic'ot pimel cha'an mi' tsijcan i juñilel mandar yic'ot pejtelel winicob x'ixicob. ²⁰Tsi' y_Λl_Λ: “Jiñach i ch'ich'el al_Λc'Λl cha'an mi' ts'actiyel jini trato che' bajche' Dios tsi' y_Λq'ueyetla mandar”, che'en. ²¹Che' ja'el tsi' tsijca ti ch'ich' jini pisil b_Λ otot yic'ot pejtelel i b_Λl mu' b_Λ i c'ajñel ti' ye'tel Dios. ²²Che' bajche' mi' y_Λl jini mandar, cojach yic'ot ch'ich' mi' s_Λq'ues_Λntel ti pejtelel. Machic mi' bejq'uel i ch'ich'el i majtan Dios, ma'anic i ñu_Λs_Λntel mulil.

An i ñu_Λs_Λntel mulil come Cristo tsi' y_Λc'Λ i b_Λ ti

tsansantel

²³ Che' jini tsa' wersa saq'uesanti jini Tabernáculo yic'ot i bał, jiñach i yejtal jach chuqui tac an ti panchan. Pero tsa' saq'uesanti i cha'año' ba Dios yic'ot yamba tsansabil ba i majtan Dios, ñumen wen ba. ²⁴ Come Cristo ma'anic tsa' ochi ti Ch'ujul ba Ajñibal melbil ba ti c'abal, i yejtal jach ba panchan. Tsa' ochi ti panchan, jini mero Ch'ujul ba Ajñibal ba' woli' pas i ba ti' tojlel Dios cha'an mi' coltañonla. ²⁵ Junyajl jach tsa' ochi ti panchan cha'an mi' yac' i ba. Mach che'ic bajche' jini ñuc ba motomaj mu' ba i yochel ti jujump'ejl jab ti C'ax Ch'ujul ba Ajñibal yic'ot ch'ich', mach ba i ch'ich'elic. ²⁶ Che'ic jini, wersa tsa' cha' chami Cristo ti jujumuc' c'alal ti' tejchibal pañimil. Pero mach che'ic. Jasal junyajl tsa' tsictiyi Cristo che' lac'alix jini cojix ba q'uin tac. Tsi' yac'a i ba ti tsansantel cha'an mi' jisabeñonla lac mul. ²⁷ I tilel junyajl jach mi' chamelob winicob x'ixicob. Mi' yujtelob ti chamel, mi' melob i ba. ²⁸ Che' ja'el, Cristo junyajl jach tsa' ajq'ui cha'an mi' cuchbeñob i mul cabalob. Mi caj i tsictiyel ti' cha'yajlel cha'an mi' coltan jini woli ba i pijtañob, pero ma'anix mi caj i chan cuch mulil.

10

¹ Jini mandar mi' pasbeñonla i yejtal jach jini mero isujm ba mu' ba caj i tilel. Mi' yaxñal pas. Ti jujump'ejl jab mi' chan tsansabeñob i majtan Dios che' mi' ch'ujutesañob che' bajche' mi' yal jini mandar. Pero jini mandar mach mejlic i ts'actesabeñob i wenlel i pusic'al. ² Tsa'ic mejli i saq'uesan jini mu' ba i ch'ujutesañob Dios, jasal

junyajl tsi' tsʌnsʌbeyob i majtan. Che'ic jini tsa' junyajlel ñusʌbentiyob i mul. ³ Pero che' mi' chʌn tsʌnsʌbeñob i majtan ti jujump'ejl jab, chʌn añix i ña'tʌntel mulil. ⁴ Come i ch'ich'el tat wacax yic'ot i ch'ich'el tat chivo mach mejlic i jisan mulil.

⁵ Jini cha'an, che' bʌ tsa' tili ti pañimil Cristo, tsi' yʌʌ: “Mach a womic tsʌnsʌbil bʌ a majtan yic'ot ofrenda. Pero tsa' chajpʌbeyon c bʌc'tal. ⁶ Ma'anic ma' mulan pulbil bʌ a majtan yic'ot yan tac bʌ mu' bʌ i yʌq'ueñetob cha'an ma' ñusʌbeñob i mul. ⁷ Jini cha'an tsa cʌʌ: Awilan, tsa'ix tiliyon cha'an mic mel chuqui a wom, Dios, che' bajche' ts'ijbubil ti bʌbil bʌ jun”. Che' tsi' yʌʌ Cristo. ⁸ Ti ñaxan tsi' yʌʌ: “Mach a womic tsʌnsʌbil bʌ a majtan, yic'ot ofrenda mu' bʌ i yʌq'ueñetob, yic'ot pulbil bʌ a majtan, yic'ot yan tac bʌ cha'an ma' ñusʌbeñob i mul. Mach che'ic ma' mulan”. Che' tsi' yʌʌ anquese ti pejtelel ili majtañʌl mi' yʌc'ob che' bajche' mi' yʌl jini mandar. ⁹ Ti wi'il tsi' yʌʌ: “Awilan, tsa' tiliyon cha'an mic mel chuqui a wom, Dios”, che'en. Che' bajche' jini, tsi' jisa jini ñaxan bʌ cha'an mi' wa'chocon jini wi'il bʌ. ¹⁰ Wʌle sʌq'uesʌbilonixla che' bajche' yom Dios cha'an tsi' yʌc'ʌ i bʌc'tal Jesucristo che' junyajl jach tsa' chʌmi cha'añonla.

¹¹ Pejtel motomaj mi' wa'tʌl ti jujump'ejl q'uin cha'an mi' cha' mel i ye'tel. Cabʌl mi' chʌn tsʌnsʌben i majtan Dios mach bʌ mejlic i wis jisan mulil. ¹² Pero Cristo junyajl tsi' yʌc'ʌ i bʌ ti' majtan Dios cha'an mi' toj lac mul ti pejtelel ora. Che' bʌ tsa' ujtʌ i yʌc' i bʌ, tsa' buchle ya' ti' ñoj Dios. ¹³ Ya' buchul woli ti pijt jinto mi' t'uchtʌntel pejtelel i contra. ¹⁴ Come ti jump'ejl jach bʌ i majtan

Dios, tsa'ix i junyajlel weñ'esayob i pusic'al jini saq'uesabilo' bΛ.

¹⁵ Che'ach mi' subeñonla ja'el jini Ch'ujul bΛ Espíritu. Ñaxan tsi' yΛΛ: ¹⁶ “Jiñach xuc'ul bΛ c t'an mu' bΛ caj c mel yic'otob che' ñumenix cabal q'uin. Mi caj cotsan c mandar ti' pusic'al”, che'en lac Yum. ¹⁷ Tsi' cha' alΛ: “Ma'anic mi caj c chΛn ña'tΛbeñob i mul yic'ot i jontolil”, che'en. ¹⁸ Che' ñusabilix lac mul, mach chΛn yomix i majtan Dios cha'an mulil.

La' lac ñochtan lac bΛ ba'an Dios

¹⁹ Jini cha'an, hermanojob, yom ch'ejl lac pusic'al mi lac toj ochel ti jini C'ax Ch'ujul bΛ Ajñibal cha'an ti' ch'ich'el Jesús. ²⁰ Ti jini tsiji' bΛ bij, jini cuxul bΛ tsa' bΛ i jambeyonla Jesús, mi laj c'axel ti junwejl pisil, jiñach i bΛc'tal. ²¹ An lac cha'an c'ax ñuc bΛ motomaj mu' bΛ i cantan i cha'año' bΛ Dios. ²² Jini cha'an la' lac lac'tesan lac bΛ ba'an Dios ti jump'ejl lac pusic'al. Mach yomic tile bixel lac pusic'al che' mi lac ñop. Yom saq'uesabil lac pusic'al. Yom pochil lac bΛc'tal ti yΛx bΛ ja'. ²³ La' lac chΛn ac' ti lac pusic'al chuqui ñopol lac cha'an woli bΛ lac pijtan. Come xuc'ul jini tsa' bΛ i yΛc'Λ i t'an. ²⁴ La' laj coltan lac bΛ ti pejtelel chuqui wen, cha'an mi laj c'uxbin lac bΛ bajche' yom yic'ot wen bΛ lac melbal. ²⁵ Mach yomic mi laj cΛy lac tempa lac bΛ che' bajche' mi' bixel melob lamital. La' lac ch'ejl'esan lac bΛ. Cojcoj wΛle che' woli ti lac'tiyel jini cojix bΛ q'uin che' bajche' woli la' q'uel.

Mi woli lac cha'len mulil cha'an jach la com

²⁶ Mi an majch mi' chΛn cha'len mulil cha'an jach yom i pusic'al che' cañlix i cha'an i sujmllel,

wolix i ñusan Cristo tsa' b_Λ i tojbe i mul. Ma'anix majch mi caj i ch_Λn tojben i mul. ²⁷ An jach b_Λb_Λq'uen b_Λ mu' b_Λ i pijtan che' mi caj i tojob i mul ti' c'ac'al i mich'ajel Dios pejtel i contrajob. ²⁸ Majqui jach tsi' ñus_Λbe i mandar Moisés tsa' ts_Λns_Λnti che' b_Λ tsi' tsictesayob cha'tiquil uxtiquil testigojob. Ma'anic majch tsi' p'unta. ²⁹ ¿Mach ba ñumeniquix mi caj i toj i mul jini mu' b_Λ i ts'a'len i Yalobil Dios? Che' mi' ñusan jini xuc'ul b_Λ t'an yic'ot i ch'ich'el mu' b_Λ i s_Λq'uesañonla woli' ts'a'len jini Espíritu woli b_Λ i p_Λyonla ti' yutslel i pusic'al. Ña'tanla cab_Λlix i mul jini winic. Cab_Λl mi caj i taj wocol che' mi' toj i mul. ³⁰ La cujil jiñ_Λch lac Yum tsa' b_Λ i y_Λl_Λ: “Joñon mij q'uextan jontolil. Joñon mi caj c_Λq'uen i toj”. Tsi' cha' al_Λ: “Lac Yum mi caj i mel i cha'año' b_Λ”. ³¹ B_Λb_Λq'uen jax muq'wic i y_Λq'ueñonla lac toj lac mul jini cuxul b_Λ Dios.

³² Cha' ña'tanla bajche' tsa' la' mele ti yamb_Λ ora. Che' b_Λ tsa' la' ch'_Λmbe isujm, ch_Λn xuc'uletla yic'ot lac Yum anquese cab_Λl jax tsa' la' ñusa wocol. ³³ Tsa' wajlentiyetla, tsa' tic'l_Λntiyetla ti' wut la' pi'_Λlob. Yaño' b_Λ ti la' tojlel tsi' coltayob jini tic'l_Λbilo' b_Λ. ³⁴ Come tsa' la' p'unta jini tsa' b_Λ m_Λjquiyob. Che' b_Λ tsa' xujch'inti la' chub_Λ'an tsa' la' cuchu yic'ot i tijicñ_Λyel la' pusic'al. Come la' wujil an ñumen wen b_Λ la' chub_Λ'an ti panchan mach b_Λ yujilic jilel.

³⁵ Jini cha'an mach mi la' s_Λt i ch'ejlel la' pusic'al, come añ_Λch ñuc b_Λ la' chobejt_Λbal woli b_Λ la' pijtan. ³⁶ Yom ch_Λn xuc'uletla ti' cuchol wocol cha'an mi la' taj chuqui tac albil i cha'an Dios che' b_Λ tsa'ix la' mele chuqui yom Dios: ³⁷ “Come jumuc' to mi

caj i tilel jini tal b_Λ. Mach jalix mi caj i tilel. ³⁸ Jini toj b_Λ i pusic'al mi caj i taj i cuxt_Λlel cha'an tsi' ñopo Dios. Pero mi tsi' c_Λy_Λ i ñopon mach tijicñayic mi caj j q'uel", che'en. ³⁹ Pero mach lajalonicla bajche' jini mu' b_Λ i cha' c_Λy i ñopob, mu' b_Λ i majlelob ti c'ajc. Joñonla mi lac ñop Dios mu' b_Λ i coltan lac ch'ujlel.

11

Che' mi lac ñop Dios

¹ Jini mu' b_Λ i ñop Dios, xuc'ul i pusic'al mi' pijtan. Mi' ñop ti isujm tal jini mach b_Λ tsiquilic. ² Che' _Λch tsi' ñopoyob Dios jini winicob ti oñiyi. Jini cha'an Dios tsi' q'ueleyob ti uts'at. ³ Cha'an tsa'ix lac ñopo Dios, la kujil tsa' mejli pañimil ti' p' _Λt_Λlel jach i t'an Dios. Dios ma'anic tsi' c' _Λñ_Λ chuqui tac tsiquil cha'an mi' mel jini pañimil woli b_Λ laj q'uel.

⁴ Cha'an tsi' ñopo Dios, Abel tsi' y_Λq'ue ñumen wen b_Λ i majtan bajche' Caín. Jini cha'an Dios tsi' q'uele ti toj. Tsi' subu uts'at i majtan tsa' b_Λ i y_Λc' _Λ Abel. Anquese tsa' ch_Λmi Abel woli to i c_Λntesañonla cha'an tsi' ñopo Dios.

⁵ Cha'an tsi' ñopo Dios Enoc ma'anic tsa' ch_Λmi. Cuxul tsa' p_Λjyi letsel ti panchan. Ma'anix majch tsa' mejli i ch_Λn q'uel, come Dios tsi' p_Λy_Λ letsel. Ts'ijbubulix uts'at tsa' ajni Enoc yic'ot Dios w_Λ' ti pañimil. Tsi' tijicñes_Λbe i pusic'al. ⁶ Mi ma'anic mi lac ñop Dios, mach mejlic i q'uelonla ti uts'at. Come majqui jach yom i c_Λn Dios, wersa mi' ñop mi an Dios, come jiñ_Λch mu' b_Λ i y_Λq'uen i chobejt_Λbal majqui jach mi' tsajcan.

⁷ Noé tsi' ñopo Dios. Jini cha'an tsi' jac'be i t'an ba' ora Dios tsi' sube chuqui mi' caj ti ujtel che' maxto tsiquilic. Tsi' mele jini colem barco cha'an mi' coltan pejtelel año' b_Λ ti' yotot. Cha'an tsi' ñopo Dios, Noé tsi' tsictes_Λbeyob i mul pejtelel año' b_Λ ti pañimil. Tsa' aq'uenti toj b_Λ i pusic'al cha'an mi' yochel ti' cha'an b_Λ Dios yic'ot pejtél mu' b_Λ i ñopob.

⁸ Abraham tsi' ñopo Dios. Jini cha'an tsi' jac'_Λ i p_Λyol. Tsa' majli i taj i lum tsa' b_Λ subenti mi' caj i y_Λq'uentel. Tsa' loq'ui anquese mach ña't_Λbilic i cha'an baqui woli' majlel. ⁹ Cha'an tsi' ñopo Dios, Abraham tsa' chumle ya' ti jini yajc_Λbil b_Λ lum che' bajche' tsi' sube lac Yum. Ya' tsa' chumle ti' lumal yamb_Λ yum_Λlob. Tsa' chumle ti' pisil b_Λ otot che' bajche' Isaac yic'ot Jacob tsa' b_Λ aq'uentiyob jini jach b_Λ t'an albil b_Λ cha'an Dios. ¹⁰ Come Abraham tsi' pijta jini tejclum am b_Λ i c'_Λclib, chajp_Λbil b_Λ i cha'an Dios, melbil b_Λ i cha'an.

¹¹ Abraham tsi' ñopo Dios. Jini cha'an tsa' mejli i tech i yalobil, anquese cab_Λlix i jabilel. Xñejep'ix Sara ja'el. Pero Abraham tsi' ñopo mi' caj i ts'_Λctiyel i t'an Dios che' bajche' tsa' subenti. ¹² Jini cha'an anquese wen ñoxix Abraham, tsa' ochi ti' tat cab_Λ i p'olbal che' bajche' jini ec' am b_Λ ti panchan, yic'ot i ji'il i ti' colem ñajb mach b_Λ mejlic ti tsijquel.

¹³ Ti pejtelelob xuc'ul to tsi' ñopoyob Dios c'_Λlal che' b_Λ tsa' ch_Λmiyob. Ma'anic tsa' aq'uentiyob chuqui tsa' subentiyob. Tsa' jach i ñajti q'ueleyob cha'an jini albil b_Λ t'an. Tsi' ñopoyob. Tsi' pijtayob. Tsi' y_Λl_Λyob mach i lumalic ili pañimil. Xñumelob jach. ¹⁴ Pejtél mu' b_Λ i y_Λlob yamb_Λy_Λch i lumal mi' tsictesañob i b_Λ, come woli' s_Λclañob mero i lumal. ¹⁵ Tsa'ic i ña'tayob jiñ_Λch i lumal tsa' b_Λ i

caꝿꝿꝿyob, isujm tsa' mejliyob ti cha' sujtet. ¹⁶ Pero tsi' pijtayob jini ñumen wen bꝿ i lumal am bꝿ ti panchan. Jini cha'an ma'anic mi' cha'len quisin Dios che' mi' diosiñob, come tsa'ix i melbeyob i tejclum.

¹⁷ Cha'an tsi' ñopo Dios Abraham, tsi' ꝿꝿꝿꝿ Isaac cha'an i majtan Dios che' bꝿ tsa' ilꝿbenti i pusic'al. Jini tsa' bꝿ aq'uenti jini albil bꝿ t'an tsi' ꝿꝿꝿꝿue Dios cojach bꝿ i yalobil ti' majtan. ¹⁸ Tsa' subenti Abraham: "Loq'uem ti Isaac mi' caj i tilel mero a p'olbal". ¹⁹ Abraham tsi' ña'ta an i p'ꝿꝿꝿꝿlel Dios cha'an mi' cha' tech loq'uel ba'an chꝿmeño' bꝿ. Che' bꝿ tsi' ꝿꝿꝿꝿ i yalobil, che'ꝿch tsa' ujti yilal. Tsi' cha' ꝿꝿꝿꝿ sujtet.

²⁰ Cha'an tsi' ñopo Dios Isaac, tsi' ꝿꝿꝿꝿueyob i yutslel i t'an Jacob yic'ot Esaú. Tsi' subeyob chuqui tac mi' caj ti ujtel. ²¹ Cha'an tsi' ñopo Dios Jacob, tsi' ꝿꝿꝿꝿueyob i yutslel i t'an i yalobilob José che' yomix chꝿmel. Tsi' c'uchchoco i bꝿ i ch'ujutesan Dios che' chucul i cha'an i xꝿmbal te'. ²² Cha'an tsi' ñopo Dios José, tsi' ꝿꝿꝿꝿ mandar che' yomix chꝿmel cha'an mi' mucob ti' lumal, come tsi' wꝿñ a ña'ta mi' caj i loq'uelob ti Egipto.

²³ Cha'an tsi' ñopoyob Dios i tat i ña' Moisés, tsi' mucuyob uxp'ejl uw che' bꝿ tsi' yila pañimil i yalobil, come wen uts'at tsi' q'ueleyob. Ma'anic tsi' bꝿꝿñayob i mandar rey. ²⁴ Cha'an tsi' ñopo Dios Moisés, che' winiquix, ma'anix tsi' chꝿꝿ ꝿejca ti' ña' i yixic'al jini Faraón. ²⁵ Tsi' ꝿꝿꝿꝿ i bꝿ i yubin i tic'lꝿntel yic'ot i cha'año' bꝿ Dios. Ma'anic tsi' yajca cha'an mi' poj tijicñesan i pusic'al jumuc' ti mulil. ²⁶ Tsi' ña'ta ti' pusic'al ñumen an i c'ꝿñibal lac tic'lꝿntel cha'an Cristo bajche' ꝿejtelel chubꝿañꝿ

ti Egipto. Come xuc'ul tsi' pijta i chobejtΛbal.
²⁷ Cha'an tsi' ñopo Dios, tsa' loq'ui Moisés ti Egipto. Ma'anic tsi' bΛc'ñΛbe i mich'ajel rey. Xuc'ul jach tsa' ajni come woli' q'uel yilal jini mach bΛ mejlic laj q'uel.

²⁸ Cha'an tsi' ñopo Dios, tsi' teche Pascua. Tsi' subeyob i pi'Λlob cha'an mi' tsΛnsañob tiñΛme' cha'an mi' tsijcañob ch'ich' ti' ti' i yotot cha'an mi' coltΛntelob jini yΛx alΛlob ba' ora tsa' ñumi i jisañob jini ángel. ²⁹ Cha'an tsi' ñopoyob Dios, tsa' c'axiyob ti jini ChΛchΛc Ñajb che' bajche' ti tiquin lum. Jini egiptojob tsa' chΛmiyob ti ja' che' bΛ tsi' lon ñopoyob c'axel.

³⁰ Cha'an tsi' ñopoyob Dios, tsa' yajli ts'ajc ti' joytilel Jericó che' ujtemix i joyojtañob wucp'ejl q'uin. ³¹ Cha'an tsi' ñopo Dios Rahab, am bΛ cabΛ i yixic, ma'anic tsa' jili yic'ot jini xñusa t'añob, come tsi' pΛyΛ ochel jini stsajiyajob cha'an mi' coltañob.

³² ¿Chuqui to yom mic sub? Ma'anic i yorajlel cha'an mic sub chuqui tsi' meleyob Gedeón, Barac, Sansón, Jefté, David, Samuel, yic'ot x'alt'añob.

³³ Cha'an tsi' ñopoyob Dios, tsa' mΛjli i cha'añob ti' contra reyob, tsi' cha'leyob chuqui toj, tsi' tajayob chuqui tac albil, tsi' mΛcbeyob i yej bajlum,

³⁴ tsi' yΛpΛyob ts'Λplaw bΛ c'ajc, tsi' puts'tayob i yej espada. Che' c'uñob tsa' p'Λt'esΛntiyob. Tsa' p'Λtayob ti guerra. Che' motocñayob i contrajob ch'oyolo' bΛ ti yambΛ lum, tsi' yajñesayob. ³⁵ An meba' x'ixicob tsa' bΛ i cha' pΛyΛyob jini chΛmeño' bΛ i cha'añob tsa' bΛ cha' ch'ojyiyob. Yaño' bΛ tsa' p'ump'un tic'Λntiyob. Pero ma'anic tsi' jac'Λyob colel, come yomob i taj jini ñumen uts'at bΛ mu'

bΛ caj i yΛq'uentelob ba' ora mi' cha' ch'ojoyelob jini chΛmeño' bΛ. ³⁶ Yaño' bΛ tsa' wajlentiyo. Tsa' bajbentiyob ti asiyal. Yaño' bΛ tsa' cΛjchiyob ti cadena. Tsa' mΛjquiyob. ³⁷ Tsa' jujliyob ti xajlel. Tsa' setuntiyob ti sierra. Tsa' tsΛnsΛntiyob ti espada. LΛpΛ i cha'año i pΛchΛlel tiñΛme' yic'ot chivo, tsa' pam ñumiyob ti xΛmbal. Ma'año i chubΛ'an. Tic'lΛbilob. CabΛ i wocol. ³⁸ Pero wen uts i pusic'al ti' tojlel jini jontolo' bΛ. Tsiquil mach i lumalic ili pañimil. Tsa' pam ñumiyob ti tiquin lum yic'ot ti wits. Tsa' chumleyob ti ch'en tac yic'ot ti yebal xajlel.

³⁹ Ti pejtelelob tsa' q'uejliyob ti uts'at cha'an tsi' ñopoyob Dios. Pero ma'anic tsa' aq'uentiyob ti pañimil chuqui tsi' pijtayob. ⁴⁰ Come Dios tsi' ña'ta uts'at mi' pijtaño chuqui ñumen ñuc mu' bΛ caj i tajob yic'otonla che' temel mi la cΛq'uentel lac wenlel yic'otob ba' ora mi' ts'actiyel i t'an.

12

Toj yom mi lac tsajcan majlel Jesús

¹ Joyolonla ti cabal testigojob che' bajche' colem total. Jini cha'an la' lac junyajlel cΛy pejtelel mu' bΛ i mΛctaño i yic'ot pejtelel mulil mu' bΛ i yΛc'onla ti cΛytΛ. La' lac chΛn cha'len wersa che' bajche' jini wen yujil bΛ ajñel cha'an mi lac taj jini woli bΛ lac pijtan. ² Toj jach yom mi lac tsajcan majlel Jesús mu' bΛ i yΛq'ueño i lac ñop. Mi caj i ts'actesΛbeño i ja'el chuqui mi lac ñop. Jesús ma'anic tsi' xoyo i bijlel ti' tojlel wocol, come tsi' q'uele jini tijicña bΛ woli bΛ i pijtan. Jini cha'an tsi' yΛc'Λ i bΛ ti quisin che' bΛ tsa' chΛmi

ti cruz. Tsa' buchle ti' ñoj Dios ya' ti' yum_Λntel. ³ Na'tanla bajche' tsi' ñusa wocol che' ts'a'lebil i cha'an xmulilob, ame lujb' aquetla ti wocol ame mi la' lij la' b_Λ.

⁴ Come maxto anic tsa' la' w_Λc'_Λ la' b_Λ ti ts_Λns_Λntel ti' cuchol wocol cha'an mi la' contra-jin mulil. ⁵ Tsa'ix ñaj_Λyi la' cha'an bajche' tsi' xic'beyetla Dios che' bajche' mi lac xic'ben la calobil. Tsi' y_ΛΛ: “Calobil, mach a ts'a'len i ju's_Λntel a pusic'al ti lac Yum. Mach a lij a b_Λ che' mi' tiq'uet lac Yum. ⁶ Come lac Yum mi' ju's_Λben i pusic'al majqui jach mi' c'uxbin. Mi' toj'esan pejtelel mu' b_Λ i yotsan ti' yalobil”, che'en.

⁷ Mi woli la' cuch ti uts'at i ju's_Λntel la' pusic'al, Dios woli' q'ueletla che' bajche' i yalobil. Come wersa mi' ju's_Λbentel i pusic'al pejtelel al_Λ c'uxbibil b_Λ i cha'an i tat. ⁸ Mi ma'anic mi' ju's_Λbeñet la' pusic'al, che' bajche' lac tilel ti' tojlel lac tat, mach i yalobileticla. Yañ_Λch b_Λ la' tat. ⁹ Come lac tatob ti pañimil tsi' ju's_Λbeyonla lac pusic'al. Tsa' lac ch_Λn q'ueleyob ti ñuc. ¿Mach ba yomic ñumen mi lac ch'ujbiben i t'an lac Tat ti panchan cha'an cuxul mi la cajñel? ¹⁰ Isujm ya cha'p'ejl uxp'ejl jach jab lac tat tsi' ju'sayob lac pusic'al che' bajche' tsi' bajñel ña'tayob ila ti pañimil. Pero Dios mi' ju'san lac pusic'al cha'an mi la cochel ti ch'ujul che' bajche' ch'ujul Dios, cha'an mi lac taj lac wenlel. ¹¹ Isujm mach tijicñayic mi la cubin che' an majqui mi' ju's_Λbeñonla lac pusic'al. Poj ch'ijiyem mi la cubin. Pero ti wi'il mi' y_Λc' ti p'ojlel toj b_Λ lac pusic'al yic'ot i ñ_Λch't_Λlel lac pusic'al che' b_Λ tsa'ix lac jac'_Λ ti uts'at.

C_Λntan la' b_Λ cha'an ma'anic majch mi' c_Λy i

yutslel i pusic'al Dios

¹² Jini cha'an p'atesan c'un b_Λ la' c'ab. P'atesan c'un b_Λ la' pix. ¹³ P_Λt_Λ toj b_Λ bij ame yajlic jini q'uichq'uichña b_Λ mi' cha'len x_Λmbal. La'p'at_Λc. ¹⁴ Ch_Λn cha'lenla wersa cha'an mi la' wajñel ti ñ_Λch'Λl yic'ot pejtelel winicob x'ixicob. Ñopola ajñel ti ch'ujul, come jini mach b_Λ ch'ujulic ma'anic mi caj i q'uel lac Yum. ¹⁵ Tsajiletla ame anic juntiquil ti la' tojlel mu' b_Λ i ñ_{us}Λben i yutslel i pusic'al Dios. C_Λntan la' b_Λ ame anic jini ch'aj b_Λ mu' b_Λ i tech mich'ajel ti la' pusic'al ame i bib'es_Λbeñob i pusic'al cab_Λlob. ¹⁶ Tsajiletla ame anic majch mi' taj i yixic, ame anic majch mi' ts'a'len jini albil b_Λ i cha'an Dios che' bajche' Esaú. Tsi' choño i y_Λscuñil che' an i wi'ñal cha'an mi' poj taj i b_Λ i ñ_Λc'. ¹⁷ Come la' wujil, che' yom i ch'Λm bendición ti wi'il, ma'anic tsa' mejli. Anquese tsi' mele i pusic'al ti uq'uel, ma'anix tsa' mejli i mel i b_Λ.

¹⁸ Come mach p_Λybileticla ti wits che' bajche' israelob ba' mi la' wubin c'ajc, yic'ot sutujt ic', yic'ot ic'yoch'an b_Λ pañimil, yic'ot b_Λb_Λq'uen b_Λ ja'al, ¹⁹ yic'ot i t'an trompeta, yic'ot i t'an Dios. Jini tsa' b_Λ i yubiyob jini t'an tsi' c'ajtibeyob Moisés ti wocol t'an cha'an ma'anic mi' ch_Λn pejcañob Dios. ²⁰ Come mach cujchic i cha'añob che' b_Λ tsa' subentiyob wersa mi caj i jujlel ti xajlel majqui jach mi' t_Λl jini wits, mi winic mi a_Λc'Λl. ²¹ C'ax b_Λb_Λq'uen chuqui tsi' q'ueleyob. Moisés tsi' y_ΛΛ_Λ: "Woli' toj sajtel c pusic'al. Tsiltsilñayon ti b_Λq'uen", che'en.

²² Pero jatetla tsa'ix c'otiyetla ti wits i c'aba' Sion, i tejclum jini cuxul b_Λ Dios, jini Jerusalén am b_Λ ti

panchan ba' temp_Λbilob bajc'Λl ángelob. ²³ Tsa'ix c'otiyetla ba' temp_Λbilob y_ΛX al_Λl b_Λ i yalobilob Dios ts'ijbubil b_Λ i c'aba' ti panchan. Ya'an Dios mu' b_Λ i mel pejtelel winicob. Ya' añob i ch'ujlel toj b_Λ winicob tsa' b_Λ cha' mejliyob ti uts'at. ²⁴ Tsa'ix c'otiyetla ba'an Jesús, jini tsa' b_Λ i y_Λq'ueyonla jini tsijib xuc'ul b_Λ t'an ba' tsijc_Λbil i ch'ich'el cha'an mi' ñu_Λantel lac mul. Ñumen uts'at i ch'ich'el come ma'anic mi' c'ajtin i q'uexol che' bajche' i ch'ich'el Abel.

²⁵ Tsajiletla ame la' ñusan lac Yum woli b_Λ ti t'an. Come tsi' wersa tojoyob i mul jini israelob che' b_Λ tsi' ñu_Λabeyob i t'an Moisés i winic Dios w_Λ' ti pañimil. Ñumen mi caj lac toj joñonla mi woli lac ñusan Dios mu' b_Λ i pejcañonla ya'ti panchan. ²⁶ Che' b_Λ tsi' cha'le t'an Dios ya' ti wits tsi' ñijca pañimil ti' t'an. Pero w_Λle che' b_Λ tsi' y_Λq'ueyonla i t'an tsi' y_ΛΛ: “Junyajl to mi caj c ñijcan pañimil yic'ot panchan, mach jinic jach pañimil”. Che' tsi' y_ΛΛ. ²⁷ Che' b_Λ tsi' y_ΛΛ: “Junyajl to”, tsi' y_Λq'ueyonla lac ña'tan mi' caj ti q'uext_Λyel jini melbil tac b_Λ yujil b_Λ ñijc_Λyel, cha'an mi' jalijel chuqui tac mach yujilic ñijc_Λyel. ²⁸ La' lac ch_Λn suben Dios wocolix i y_ΛΛ cha'an woli la cochel ti' yum_Λantel mach b_Λ yujilic ñijc_Λyel. La' lac ch'ujutesan Dios ti uts'at yic'ot pejtel lac pusic'al yic'ot b_Λq'uen. ²⁹ Come Dios yujil jisaya che' bajche' c'ajc.

13

Bajche' yom mi' yajñelob hermanojob

¹ Ch_Λn c'uxbin la' b_Λ, come hermanojetla ti Cristo. ² Mach ñaj_Λyic ti la' pusic'al la' p'untan

jini xñumelob mach b_Λ c_Λñ_Λlobic la' cha'an. An i tajol tsi' m_Λc'layob ángelob lac tatob che' mach c_Λmbilobic i cha'añob. ³ Coltanla jini x_majquelob. P'untañob che' bajche' la' wom p'unt_Λntel ya'ic añetla ti m_Λjquib_Λ. Ña'tanla jini woliyo' b_Λ ti wocol che' bajche' jatet_Λchla woli b_Λ la' wubin wocol.

⁴ Ña'tanla uts'at ñujpuñel, uts'at mi' p_Λy i yijñam winic. Yom xuc'ul mi' pi'leñob i b_Λ. Come majqui jach mi' taj i yixic, mi an i yijñam, o mi ma'anic i yijñam, Dios mi caj i mel. ⁵ Mach mi la' ts_Λjyun taq'uin. Yom tijicña mi la' wajñel yic'ot chuqui tac an la' cha'an. Come Dios tsi' y_ΛΛ: “Ma'anic mi caj a c_Λyt_Λ ti meba'. Ma'anic mi caj j c_Λyet”, che'en. ⁶ Jini cha'an, yom ch'ejl lac pusic'al mi lac sub: “Lac Yum jiñ_Λch caj Coltaya. Ma'anic mi caj c b_Λc'ñan chuqui mi' tumbeñon winicob”, cho'onla.

⁷ Ña'tanla jini x_cantayajob la' cha'an tsa' b_Λ i subeyetla i t'an Dios. Ña'tanla jaytiquil la' pi'lob tsa' b_Λ i tajayob i wenlel ti chajp ti chajp ti' tojlelob. Ñopola Dios che' bajche' tsi' ñopoyob. ⁸ Jesucristo junlajal_Λch ac'bi yic'ot w_Λle yic'ot ti pejtelel ora. ⁹ Mach mi la' w_Λc' la' b_Λ cha'an mi la' jac' yamb_Λ c_Λntesa am b_Λ i sajtemal ti chajp ti chajp. Come mi lac taj i xuc't_Λlel lac pusic'al cha'an i yutslel i pusic'al Dios, mach cha'anic we'el_Λ. Mi woli laj c'ux we'el_Λ o mi ma'anic woli laj c'ux, ma'anic mi' coltañonla ti tojlel Dios. Tsa' jiliyob jini tsa' b_Λ i jac'ayob ili c_Λntesa cha'an i b_Λ ñ_Λc'Λ. ¹⁰ An pul_Λntib lac cha'an, jiñ_Λch i cruz Cristo ba' mach mejlic i colt_Λntel jini mu' b_Λ i ch_Λn ñop i coltan i b_Λ ti' jac'ol jini mandar.

¹¹ Jini c'ax ñuc b_Λ motomaj tsi' ch'Λm_Λ ochel

i ch'ich'el alac'al ti Ch'ujul b_Λ Ajñibal cha'an i ñus_Λantel mulil. Tsi' puluyob i b_Λc'tal alac'al ti junwejl i ti' tejclum. ¹² Che' ja'el Jesús tsi' yubi wocol ti junwejl i ti' tejclum cha'an mi' s_Λq'uesañonla ti' bajñel ch'ich'el. ¹³ Jini cha'an la' lac l_Λc'tesan lac b_Λ ba'an Jesús ti junwejl i ti' tejclum. La' laj cuch lac ts'a'lentel che' bajche' Jesús. ¹⁴ Mach w_Λ'ic an lac tejclum. Pero woli lac sajcan jini tal to b_Λ tejclum yujil b_Λ jalijel.

¹⁵ Jini cha'an che' colt_Λbilonla cha'an Jesús, la' lac ch_Λn sub i ñucl_Λel Dios ti' tojlel winicob. Jiñach mero i majtan. ¹⁶ Mach yomic mi' ñaj_Λyel ti la' pusic'al i melol chuqui uts'at cha'an mi' la' coltan la' pi'lob, come jiñach i majtan Dios uts'at b_Λ mi' q'uel.

¹⁷ Jac'benla i t'an x_Λc_Λntayajob la' cha'an. Otsan la' b_Λ ti' wenta come añob i ye'tel cha'an mi' wen p_Λsbeñetla i bijlel la' colt_Λntel. Wersa mi' caj i subob i b_Λ ti' tojlel Dios. Mi' uts'at mi' la' jac'ob tijicña mi' caj i subob. Pero mi' wola' w_Λq'ueñob i ch'ijiyemlel i pusic'al mach che'ic mi' la' taj la' wenlel.

¹⁸ Yom mi' la' tajon lojon ti oración. Cujil lojon ma'anic c mul lojon ti la' tojlel. Come ti pejtelel lojon c pusic'al com c mel lojon chuqui uts'at. ¹⁹ La' wocolic cha'lenla oración cha'an mach ch_Λn jalix mic cha' tilel ba' añetla.

Cortesía tac

²⁰ Dios_Λch mu' b_Λ i ñ_Λch'chocoñonla. Tsi' teche loq'uel lac Yum Jesucristo ba'an ch_Λmeño' b_Λ. Jiñach ñuc b_Λ X_Λc_Λnta tiñ_Λme'. Tsi' beq'ue i ch'ich'el cha'an i sellojlel jini xuc'ul b_Λ t'an mach b_Λ anic mi' jilel. ²¹ La' i y_Λq'ueñetla pejtelel chuqui anto yom

la' cha'an, cha'an mi la' mel ti pejtelel ora chuqui yom Dios. La' i mel i ye'tel Dios ti jatetla ti'p'atlatel Cristo che' bajche' mi' mulan. La' tsictiyic i ñuclél Cristo ti pejtelel ora. Amén.

²² A wocolic hermanojob, yom uts'at mi la' jac' la' xic'bentel, come ts'ita jach tsac ts'ijbubeyetla.

²³ Ña'tanla librejix la quermano Timoteo. Mi mach jalix mi' julel ilayi, ya' talon ti jula' quic'ot.

²⁴ Aq'uenla cortesía pejtelel xcantayajob la' cha'an, yic'ot pejtelel i cha'año' b_Λ Dios. Mi' y_Λq'ueñetla cortesía jini ch'oyolo' b_Λ ti Italia. ²⁵ La' ajnic i yutslél i pusic'al Dios la' wic'ot ti la' pejtelel.

I T'an Dios
Bible without Deuterocanon in Chol Tumbala; ctu
(MX:ctu:Chol)

copyright © 1977 Wycliffe Bible Translators, Inc.

Language: Chol

Translation by: Wycliffe Bible Translators, Inc.

Chol, Tumbalá [ctu], Mexico

Copyright Information

© 1977, Bible League International

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Chol

© 1977, Bible League International

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 21 Feb 2024 from source files
dated 29 Jan 2022

45de077a-5b47-572a-bd9d-72438a3be945